

Na osnovu poglavlja IV odjeljka A člana 23., a u vezi sa članom 17. stav 1. tačka h. i članom 18. Ustava Bosansko-podrinjskog kantona Goražde ("Službene novine Bosansko-podrinjskog kantona Goražde", broj: 8/98, 10/00 i 5/03), i člana 106. Poslovnika Skupštine Bosansko-podrinjskog kantona Goražde ("Službene novine Bosansko-podrinjskog kantona Goražde", broj:10/08), na prijedlog Vlade Bosansko-podrinjskog kantona Goražde, Skupština Bosansko-podrinjskog kantona Goražde na svojoj_____redovnoj sjednici održanoj dana_____2012.godine, donosi:

Z A K O N

O NOVČANIM PODSTICAJIMA U POLJOPRIVREDI I RURALNOM RAZVOJU NA PODRUČJU BOSANSKO -PODRINJSKOG KANTONA GORAŽDE

I. OPĆE ODREDBE

Član 1.

Ovim zakonom propisuju se u Bosansko-podrinjskom kantonu Goražde (u daljem tekstu: Kanton) izvori i visina novčanih sredstava, modeli podsticaja, korisnici-klijenti novčanih podsticaja, opšti i posebni uslovi za ostvarenje novčanih podsticaja, realizacija ostvarenja novčanih podsticaja, izvještavanje i čuvanje dokumentacije, nadzor nad provođenjem ovog zakona, kaznene odredbe, prelazne i završne odredbe.

Član 2.

Svrha donošenja ovog zakona je usklađivanje-harmonizacije mjera novčanih podsticaja između Federacije, Kantona i Općina, obezbjeđenje sigurnosti i kontinuiteta novčanih podsticaja sa ciljem stvaranja i podsticanja poljoprivredne proizvodnje do nivoa samoodrživosti i profitabilnosti u formi tržišno orijentiranih robnih poljoprivrednih proizvođača, podsticanje tehničko-tehnološkog i organizacionog unaprjeđenja sektora poljoprivrede, osiguranje stabilnog poljoprivrednog dohotka i omogućavanje adekvatnog životnog standarda poljoprivrednog proizvođača.

Član 3.

U smislu ovog Zakona, pojedini izrazi imaju slijedeće značenje:

a) „Poljoprivredna djelatnost“ podrazumijeva privrednu djelatnost koja obuhvata biljnu i animalnu proizvodnju i sa njima povezane uslužne djelatnosti u skladu sa standardnom klasifikacijom djelatnosti u Bosni i Hercegovini.

b) „Poljoprivredno gazdinstvo“ podrazumijeva proizvodnu jedinicu ili grupu jedinica koje čine proizvodnu cjelinu i sa tehničkog i privrednog gledišta, koje se bave proizvodnjom poljoprivrednih proizvoda; gazdinstvo se može baviti i drugim djelatnostima (nepoljoprivrednim) proizvodnim i uslužnim djelatnostima. Poljoprivredno gazdinstvo može djelovati kao privredno društvo, obrt ili zadruga ako je registrovano za obavljanje poljoprivredne djelatnosti, te kao porodično poljoprivredno gazdinstvo.

c) „Porodično poljoprivredno gazdinstvo“ je samostalna privredna i socijalna jedinica zasnovana na vlasništvu i/ili upotrebi proizvodnih resursa i upravljanju porodice u obavljanju poljoprivredne djelatnosti.

d) „Nosilac poljoprivrednog gazdinstva“ podrazumijeva fizičko ili pravno lice, ili grupu fizičkih i pravnih lica u skladu sa statusom koji ima grupa i njeni članovi prema zakonima u Bosni i Hercegovini i Federaciji Bosne i Hercegovine, a čije se gazdinstvo nalazi na teritoriji Kantona, te obavlja poljoprivrednu djelatnost i koji je u Registru poljoprivrednih gazdinstava upisan kao nosilac gazdinstva. Vlasnik obrta registrovanog za obavljanje poljoprivredne djelatnosti je ujedno i nosilac poljoprivrednog gazdinstva. Ovlašteni zastupnik privrednog društva ili zadruga registrovane za obavljanje poljoprivredne djelatnosti je nosilac poljoprivrednog gazdinstva.

e) „Korisnik-klijent“ podrazumijeva poljoprivrednog proizvođača registrovanog za obavljanje poljoprivredne proizvodnje: pravno lice (registrovano po Zakonu o privrednim društvima i Opštem zakonu o zadrugama), fizičko lice (registrovano po Zakonu o obrtu) i neregistrovano fizičko lice koje se bavi poljoprivredom, a koje je upisano u Registar poljoprivrednih gazdinstava i Registar klijenata na području Kantona.

II. IZVORI I VISINA NOVČANIH SREDSTAVA

Član 4.

Sredstva za realizaciju novčanih podsticaja iz člana 1. ovog zakona obezbjeđuju se u Budžetu Bosansko-podrinjskog kantona Goražde (u daljem tekstu: budžet) za svaku kalendarsku godinu i iz drugih izvora.

Član 5.

Visina novčanih sredstava iz člana 4. ovog zakona koja se obezbjeđuju iz budžeta ne mogu biti manja od 3% od poreznih i neporeznih prihoda u budžetu za tekuću godinu.

Član 6.

Osim sredstava koja se izdvajaju iz člana 4. ovog Zakona, sredstva za novčane podsticaje mogu se izdvajati i u općinskim budžetima.

Član 7.

(1) Iznos novčanih podsticaja, minimalni uslovi za početak proizvodnje, minimalne površine za investiranje i rokovi podnošenja zahtjeva utvrđuju se programom o iznosima novčanih podsticaja, minimalnim uslovima za početak proizvodnje, minimalnim uslovima za investiranje i rokovima podnošenja zahtjeva (u daljem tekstu: program), a koji Vlada Bosansko-podrinjskog kantona Goražde (u daljem tekstu: Vlada) donosi za svaku kalendarsku godinu.

(2) Ministarstvo za privredu Bosansko-podrinjskog kantona Goražde (u daljem tekstu: Ministarstvo) u roku od 15 dana od dana usvajanja budžeta izrađuje prijedlog programa, organizuje javnu raspravu po prijedlogu programa, te nakon provedene rasprave isti dostavlja Vladi u roku od 30 dana od dana usvajanja budžeta, na donošenje.

(3) Vlada donosi Program iz stava (1) ovog člana najkasnije u roku od 30 dana od dana objavljivanja budžeta u “Službenim novinama Bosansko-podrinjskog kantona Goražde”.

(4) Nakon davanja saglasnosti na program od strane Vlade, ministar za privredu propisuje Uputstvo za ostvarivanje novčanih podsticaja u primarnoj poljoprivrednoj proizvodnji u roku od tridest (30) dana.

III MODELI PODSTICAJA

Član 8.

Novčani podsticaji u smislu ovog zakona obuhvataju podsticaje u sklopu mjera podsticanja proizvodnje i podsticanja u sklopu mjera strukturne politike.

- Novčani podsticaji u sklopu mjera podsticaja proizvodnji provode se kroz model proizvodnji.
- Podsticanje u sklopu mjera strukturne politike provodi se kroz:
 - a) model kapitalnih ulaganja,
 - b) model ostalih vrsta ulaganja.
 - c) model ruralnog razvoja

Član 9.

Raspodjela raspoloživih novčanih sredstava za novčane podsticaje za budžetsku godinu vrši se tako da pojedinim modelima pripadaju odgovarajući udjeli u skladu sa raspoloživim sredstvima, koji će biti regulisani programom.

Član 10.

U okviru modela proizvodnji novčani podsticaji obuhvataju:

- a) animalnu proizvodnju;
- b) biljnu proizvodnju;
- c) gljivarsku proizvodnju;
- d) organsku proizvodnju.

Član 11.

U okviru animalne proizvodnje podstiče se:

- farme mliječnih krava (držanje mliječnih grla, zootehničke mjere i veterinarske usluge);
- uzgoj priplodnih junica za remont osnovnog stada mliječnih krava;
- farma za tov junadi (uzgoj toвне junadi, nabavka podmladka i veterinarske usluge);
- uzgoj priplodnih junica za proširenje osnovnog stada mliječnih krava;
- uzgoj priplodnih ženskih teladi,
- farma ovaca i koza (uzgoj ovaca, ovnova, jagnjadi i veterinarske usluge);
- farma za tov svinja (uzgoj krmača, nerastova, prasadi, nabavka podmladka i veterinarske usluge);
- farma za tov piladi-brojlari (uzgoj brojlera, nabavka jednodnevnih pilića i veterinarske usluge);
- inkubacijska proizvodnja jednodnevnih pilića;
- farma koka nosilja (uzgoj koka nosilja, nabavka jednodnevnih ili osamnaestonedjeljnih pilenki i veterinarske usluge);
- pčelarstvo (držanje pčelinjih društava, nabavka lijekova, opreme i veterinarske usluge);
- uzgoj matica pčela
- organizovani otkup svježeg mlijeka

- vještačko osjemenjavanje krava
- proizvodnja svježeg mlijeka (kravlje, ovčije i kozije)
- uzgoj slatkovodne ribe
- držanje konja.

Član 12.

U okviru podsticanja biljne proizvodnje podstiče se:

- U okviru ratarske proizvodnje podstiču se zasijane površine, provođenje agro-tehničkih mjera, nabavka sjemena i repro materijala za:

- 1) zasijane površine merkantilnim žitaricama (pšenica, ječam, raž, zob i kukuruz)
- 2) zasijane površine heljdom;
- 3) zasijane površine ljekovitim, aromatičnim i medonosnim biljem (kamilica, menta, neven, kantarion, smilje, facelija i dr.)

- U okviru povrtlarske proizvodnje podstiče se zasijavanje površine, provođenje agro-tehničkih mjera, nabavka sjemena i repro materijala za:

- 1) zasijane površine merkantilnim krompirom;
- 2) zasijane površine sa sjemenskim krompirom
- 3) zasijane površine ostalim povrtnim kulturama.

- U okviru plasteničke/stakleničke proizvodnje podstiču se zasijane površine povrtnim kulturama (paradajz, paprika, salata, špinat, patlidžan, krastavac, luk) i uzgoj jagode u zatvorenom prostoru.

- U okviru voćarske proizvodnje podstiče se prodaja voća, proizvodnja sadnog materijala, provođenje agro-tehničkih mjera i nabavka repro materijala za:

- 1) zasnivanje novih zasada krošnjastog voća;
- 2) održavanje zasada krošnjastog voća (nakon zasnivanja od prve do pete godine po zasnivanju);
- 3) održavanje zasada autotohnog voća
- 4) zasnivanje novih zasada jagodičastog voća;
- 5) realizacija proizvodnje krošnjastog i jagodičastog voća.

Član 13.

U okviru gljivarske proizvodnje podstiče se proizvodnja gljiva u zatvorenom prostoru.

Član 14.

U okviru organske proizvodnje podstiče se certificiranje organske proizvodnje do dobijanja certifikata.

Član 15.

U okviru modela kapitalnih ulaganja podstiče se:

- Plaćanje rente za uređenje građevinskog zemljišta za poljoprivredne objekte sa završenim grubim građevinskim radovima preko 50% i to za :

- 1) štalske objekte za uzgoj goveda, ovaca i peradi u okviru poljoprivrednog gazdinstva;
- 2) objekte za skladištenje, hlađenje i sušenje poljoprivrednih proizvoda u okviru poljoprivrednog gazdinstva;
- 3) izgradnju ribnjaka.

- Rekonstrukcija štalskih objekata za uzgoj goveda, ovaca, koza i peradi.

- U okviru modela kapitalnih ulaganja podstiče se kupovina u tekućoj godini:

- 1) poljoprivrednog zemljišta isključivo za poljoprivrednu proizvodnju, a u cilju povećanja poljoprivredne proizvodnje;
- 2) novog staklenika ili plastenika;
- 3) nove poljoprivredne mehanizacije i opreme u biljnoj proizvodnji;
- 4) nove poljoprivredne mehanizacije i opreme za animalnu proizvodnju;
- 5) za peradarstvo: novi kavezi, novi sistem za pojenje, sistem za hranjenje i ventilatore za rashlađivanje;
- 6) nabavka rasplodne stoke.

Član 16.

U okviru modela ostalih vrsta novčanih podsticaja postiže se:

Ostale vrste podsticaja obuhvataju podsticaje provođenja određenih mjera strukturne politike te drugih mjera koje nisu obuhvaćene modelima kapitalnih ulaganja i ruralnim razvojem:

- 1) realizaciju pojedinačnih projekata iz oblasti poljoprivrede, a koji se ocijene značajnim za razvoj poljoprivredne proizvodnje na području našeg Kantona;
- 2) aktivnosti različitih zadruga, udruženja ili asocijacija, a koje su u funkciji razvoja poljoprivrede na području Kantona;
- 3) sufinansiranje učešća poljoprivrednika na sajmovima i drugim manifestacijama iz oblasti poljoprivrede koji se organizuju na području Kantona, području Bosne i Hercegovine i van granica Bosne i Hercegovine.
- 4) regresiranje kamata po kreditima odobrenih za poljoprivrednu proizvodnju i to za: kupovinu mehanizacije i opreme i izgradnju objekata u poljoprivredi i td,
- 5) podsticaj zdravstvenoj zaštiti životinja,
- 6) sufinansiranje osiguranja poljoprivrednih proizvođača i imovine,
- 7) sufinansiranje poljoprivrednih proizvođača registrovanih kao obrtnici,
- 8) obaveze plaćanja prema članu 124. tačka 1. Zakona o veterinarstvu.

Član 17.

U ukupno predviđenim sredstvima za podsticaj u poljoprivednoj proizvodnji i ruralnom razvoju iznos rezervnih sredstava ne može biti veći od 5%.

Rezervna sredstva se koriste u hitnim i nepredviđenim intervencijama i to:

- neophodne intervencije u primernoj poljoprivednoj proizvodnji
- u slučaju elementarnih i drugih nepogoda (snijeg, grad, suša, vjetar, poplava, požar, napad divljih životinja)
- kao i druga plaćanja koja su neophodna u sektoru poljoprivrede a nisu definisana u gore pomenutim modelima podsticaja.

Član 18.

Model ruralnog razvoja

1) Model ruralnog razvoja ima za cilj ekonomski, socijalni i kulturni napredak stanovništva u ruralnom području Bosansko-podrinjskog Kantona Goražde uz uvažavanje principa održivog razvoja.

2) Novčani podsticaj za ruralni razvoj ostvaruje se u oblasti konkurentnosti, zaštite i unapređenja ruralnog okoliša i diverzifikaciju ruralnih aktivnosti.

3) Novčani podsticaj za ruralni razvoj uvodi se radi unaprjeđenja poljoprivedne, odnosno razvoja biljne i animalne proizvodnje i sa njima povezanih nepoljoprivednih djelatnosti, te očuvanje autohtonih pasmina i zemljišta u dobrom poljoprivednom i okolišnom stanju.

Član 19.

U okviru konkurentnosti u ruralnom razvoju podstiče se:

- investicije u poljoprivedna gazdinstva,
- ruralna infrastruktura,
- stručno osposobljavanje u poljoprivedi,
- tradicionalni proizvodi;

U okviru zaštite okoliša u ruralnom području podstiče se:

- područja sa težim uslovima privređivanja u poljoprivedi,
- uvođenje agroekoloških zona,
- organska proizvodnja,
- uređenje agro okoliša,
- očuvanje autohtonih životinjskih i biljnih vrsta.

U okviru diverzifikacije ruralnih aktivnosti podstiče se:

- usluge i dopunske aktivnosti,
- očuvanje ruralnog nasleđa.

IV.KORISNICI –KLIJENTI

Član 20.

Korisnici-klijenti su pravna i fizička lica koji ostvaruju novčane podsticaje u skladu sa odredbama ovog zakona i podzakonskim propisima doneseni na osnovu ovog zakona, te ispunjavaju sljedeće opće uvjete:

- da su upisani u Registar poljoprivednih gazdinstava, odnosno Registar klijenata (u

daljem tekstu registri) u skladu sa Zakonom o poljoprivredi ("Službene novine Federacije BiH", br. 88/07 i 4/10).

- da imaju proizvodnju na području Bosansko-podrinjskog kantona Goražde,
- ispunjavaju ostale posebne propisane uvjete (propisane podzakonskim aktima).

Član 21.

Korisnici- klijenti dužni su dobijena sredstva namjenski koristiti, a Ministarstvo za privredu-sektor za poljoprivredu dokumentaciju na osnovu koje su korisnici-klijenti ostvarili novčani podsticaj, dužno je čuvati tri godine od dana dobijanja novčanih sredstava.

V. OPŠTI I POSEBNI USLOVI ZA OSTVARENJE NOVČANIH PODSTICAJA

Član 22.

Korisnik-klijent koji želi ostvariti pravo na novčane podsticaje u skladu sa ovim zakonom ima obavezu upisati se u Registar poljoprivrednih gazdinstava, odnosno Registar klijenta (u daljem tekstu: registri) u skladu sa Zakonom o poljoprivredi ("Službene novine Federacije BiH", br. 88/07 i 4/10).

Član 23.

Pravo na ostvarenje novčanih podsticaja može ostvariti korisnik-klijent koji ima proizvodnju na području Kantona.

Član 24.

Korisnik-klijent -pravno lice koji želi ostvariti pravo na novčane podsticaje mora imati registraciju na području kantona.

Član 25.

Posebne uslove i potrebnu dokumentaciju kojom se dokazuje ispunjavanje opštih i posebnih uslova za ostvarenje prava na novčani podsticaj propisat će ministar privrede Kantona Goražde (u daljem tekstu: ministar) programom i upustvima za ostvarivanje prava na novčani podsticaj.

VI. REALIZACIJA OSTVARENJA NOVČANIH PODSTICAJA

Član 26.

Novčani podsticaj relizuje se na osnovu ovog zakona, Programa podsticaja kojim se utvrđuju opći i posebni ciljevi, ukupna vrijednost novčanih podsticaja, vrsta podsticaja, visina podsticaja po jedinici proizvodnje, opšti i posebni kriteriji za otvaranje podsticaja i način ostvarivanja novčanih podsticaja.

Program podsticaja za poljoprivredu staviće se na Javnu raspravu prije što ga kantonalno Ministarstvo za privredu dostavi Vladi Bosansko-podrinjskog kantona Goražde na raspravu i usvajanje.

Član 27.

Nakon davanja saglasnosti na Program podsticaja u poljoprivredi od strane Vlade Bosansko-podrinjskog kantona Goražde, ministar za privredu Bosansko-podrinjskog kantona Goražde donosi Upustva o uslovima koje moraju zadovoljiti podnosioci zahtjeva za ostvarivanje novčanih podsticaja u poljoprivrednoj proizvodnji.

Član 28.

Ministarstvo za privredu Bosansko-podrinjskog kantona Goražde nakon donošenja Uputstava od strane Ministarstva raspisuje Javni poziv za sve vrste podsticaja u poljoprivrednoj proizvodnji definisane programom i rokovima za podnošenje zahtjeva.

Član 29.

Korisnik-klijent na propisanom obrascu zahtjevu, sa propisanom dokumentacijom dostavlja Ministarstvu za privredu u propisanom roku.

Zahtjev za ostvarenje prava na novčani podsticaj (u daljem tekstu: zahtjev) u ime korisnika-klijenta pravnog lica (privrednog društva ili zadruga) podnosi ovlašteno lice u smislu Zakona o privrednim društvima i Opšteg zakona o zadrugama, a u ime korisnika-klijenata-fizičkog lica u smislu Zakona o obrtu, nosilac gazdinstva.

Zahtjev za ostvarenje prava na novčani podsticaj u ime kandidata, porodičnog poljoprivrednog gazdinstva, podnosi lice ovlašteno od ostalih članova porodičnog poljoprivrednog gazdinstva.

Član 30.

Službenici Ministarstva za privredu (Sektora za poljoprivredu) nakon provjere dokumentacije utvrđuju činjenično stanje na terenu i zapisnički konstatuje zatečeno stanje.

Član 31.

Nakon obrade, provjere dostavljene dokumentacije i utvrđivanja činjeničnog stanja službenici Ministarstva za privredu (sektora za poljoprivredu) sačinjavaju prijedlog odluke sa ukupnim iznosom odobrenih sredstava od strane Ministarstva za privredu i upućuju Vladi Bosansko-podrinjskog kantona Goražde na davanje saglasnosti za odobravanjem novčanih sredstava.

Član 32.

Nakon davanja saglasnosti na Odluku o odobravanju novčanih sredstava od strane Vlade Bosansko-podrinjskog kantona Goražde, Ministarstvo za privredu upućuje zahtjev za isplatu novčanih sredstava Ministarstvu za finansije Bosansko-podrinjskog kantona Goražde.

Član 33.

Dokumentacija korisnika-klijenta dostavljena kantonalnom Ministarstvu uvodi se u djelovodnik predmeta i akata i momentom upisa postaje službena dokumentacija sa kojom se postupa u skladu sa Uredbom o kancelarijskom poslovanju organa uprave i

službi za upravu u Federaciji BiH ("Službene novine Federacije BiH" broj:20/98) i Uputstvom o načinu vršenja kancelarijskog poslovanja u organima uprave i službama za upravu u Federaciji BiH ("Službene novine Federacije BiH" broj: 30/98 i 49/98).

VII. IZVJEŠTAVANJE I ČUVANJE DOKUMENTACIJE

Član 34.

Izvještaj o realizaciji novčanih podsticaja u poljoprivredi Ministarstvo za privredu Bosansko-podrinjskog kantona Goražde će najmanje jednom godišnje dostaviti na razmatranje i usvajanje Vladi Bosansko-podrinjskog kantona Goražde.

Član 35.

Vlada Bosansko-podrinjskog kantona Goražde će isti po potrebi uputiti Skupštini Bosansko-podrinjskog kantona Goražde na razmatranje i usvajanje.

Član 36.

Kantonalno Ministarstvo za privredu Bosansko-podrinjskog kantona Goražde dužno je svu propisanu i prikupljenu dokumentaciju iz člana 26. ovog Zakona čuvati i omogućiti uvid u tu dokumentaciju prilikom kontrole od nadležnog kantonalnog inspektora, odnosno stručnog nadzora od ovlaštenih službenika Ministarstva za privredu Bosansko-podrinjskog kantona Goražde.

Član 37.

Dokumentacija iz člana 33. ovog Zakona mora se čuvati najmanje tri godine.

VIII. NADZOR NAD PROVOĐENJEM OVOG ZAKONA

Član 38.

Kantonalno ministarstvo privrede (Sektor poljoprivrede) vrši upravni nadzor nad primjenom ovog zakona i propisa donesenih na osnovu njega koji su ovim Zakonom stavljeni u nadležnost Kantona.

Nadzor nad provođenjem ovog zakona vrši Ministarstvo u okviru svoje nadležnosti.

Član 39.

Inspekcijski nadzor nad provođenjem ovog zakona i propisa donesenih na osnovu ovog zakona vrši kantonalni poljoprivredni inspektor u okviru svoje nadležnosti (u daljem tekstu: poljoprivredni inspektor).

Član 40.

Fizička i pravna lica koja podliježu nadzoru nadležnog poljoprivrednog inspektora dužni su pružiti potrebne podatke i obavještenja, omogućiti vršenje nadzora, odnosno osigurati uslove za nesmetan rad.

Fizička i pravna lica iz stava 1. ovog člana dužna su na zahtjev poljoprivrednog inspektora u određenom roku koji odredi inspektor dostaviti ili pripremiti podatke i materijale koji su mu potrebni za obavljanje poslova inspekcijskog nadzora.

Član 41.

U vršenju inspekcijskog nadzora poljoprivredni inspektor može privremeno oduzeti dokumente i predmete koji u disciplinskom, odnosno prekršajnom ili sudskom postupku poslužiti kao dokaz.

O privremenom oduzimanju dokumentacije ili predmeta iz stava 1. ovog člana izdaje se potvrda.

Član 42.

Nadležni poljoprivredni inspektor u provođenju inspekcijskog nadzora sastavlja zapisnik na licu mjesta, donosi rješenje kada je za to ovlašten ovim zakonom i propisima donesenim na osnovu njega.

Član 43.

Ako nadležni poljoprivredni inspektor u postupku inspekcijskog nadzora utvrdi da su povrijeđene odredbe ovog zakona i propisa donesenih na osnovu njega, narediće rješenjem da se utvrđene nepravilnosti, nedostaci uklone najkasnije u roku od 15 dana.

Član 44.

Ukoliko se utvrdi da su sredstva na ime novčanih podsticaja utvrđenih ovim zakonom utrošena nenamjenski ili ostvarena na osnovu lažno prikazane proizvodnje, kao i lažno predočene dokumentacije, kandidat-klijen je dužan vratiti novčana sredstva u roku od 30 dana od dana pravosnažnosti rješenja.

Član 45.

Protiv rješenja kantonalnog poljoprivrednog inspektora može se izjaviti žalba kantonalnom ministarstvu u roku od 8 dana od dana prijema rješenja.

IX.KAZNE NE ODREDBE

Član 46.

Kandidat-klijent koji učini prekršaj iz člana 21. i 44.ovog zakona kažnjava se novčanom kaznom:

- pravno lice u iznosu od 5.000,00 KM do 10.000,00 KM,
- odgovorno lice u pravnom licu od 1.000,00 KM do 2.000,00 KM,

Kandidat-klijent koji učini prekršaj iz člana 21. i 44. ovog zakona kažnjava se novčanom kaznom:

- fizičko lice u iznosu od 500,00 KM do 1.000,00 KM,

Član 47.

Za prekršaje iz članova 21. i 44. ovog zakona, uz novčanu kaznu, izreći će se i mjera oduzimanja novčanog podsticaja koji je ostvaren, odnosno nastao prekršajem.

X. PRELAZNE I ZAVRŠNE ODREDBE

Član 48.

Kantonalno ministarstvo će u roku od 30 dana od dana usvajanja Budžeta Bosansko-podrinjskog kantona Goražde, Vladi Bosansko-podrinjskog kantona Goražde dostaviti programe na usvajanje o vrsti, osnovnim kriterijima i načinu ostvarivanja novčanih podsticaja u primarnoj poljoprivrednoj proizvodnji i ruralnom razvoju u skladu sa članom 22. ovog zakona.

Uputstvo za ostvarivanje novčanih podsticaja u primarnoj poljoprivrednoj proizvodnji donijeće kantonalno Ministarstvo u roku od 30 dana od dana davanja saglasnosti na program iz stava 1. ovog člana.

Član 49.

Danom stupanja na snagu ovog zakona prestaje važiti Zakon o novčanim podsticajima u primarnoj poljoprivrednoj proizvodnji i ruralnom razvoju na području Bosansko-podrinjskog kantona Goražde ("Službene novine BPK-a Goražde" broj: 13/09).

Ovaj zakon stupa na snagu osmog dana od dana objavljivanja u „Službenim novinama BPK-a Goražde“.

Broj:
Goražde,

2012. godine

PREDSJEDAVAJUĆI SKUPŠTINE

Suad Došlo